

Albertos Küchenlieder, Teil 2

Des basst scho
Datenklau
Universum
Mia verbrennan
Raucher
S-Bahn-Fahrn
Vampire in Grea
Da Knupf
Zu zwoat muaßt sei
Da Wiesn-KIng

Zusammengestellt im November/Dezember 2016

Liedermacher Alberto ist Albert Zimmerer aus Isen.

Die Texte stammen aus den letzten 10 Jahren und wurden hauptsächlich für die Rock-Projekte „Rul und die Wunderkinder“ sowie „Pfeigrod“ geschrieben.

Nachdem die ersten 10 Lieder, die ich 2015 zusammengestellt habe, durchaus Spaß machten, folgen jetzt die nächsten.

www.az4isen.de

Des basst scho

Dua de ned oowe, du Perfektionist.
I kenn di, i woäß scho, dass du oana bist.
Mindestens 100prozentig muass sei.
Dann iss dei Wedaa, dann bist dabei.

Dua de ned oowe, woos soi des bringa.
Sitz de zu mia hea, deamma woos dringa.
Des geht scho, des basst scho.
Bist hint dro, du arma Mo,
Langts a no, lafft nix davo.

Du kimmst mia vor, ois waarst Du dressiert.
I kenn di, i woäß scho, dass oiwei pressiert.
Wie kunn ma denn bloß so ungmütlich sei.
Oiwei korrekt und nia aus da Reih.

Du kimmst mia vor, ois mechst woos erzwinga.
Sitz de zu mia hea, deamma woos dringa.
Des geht scho, des basst scho.
Bist hint dro, du arma Mo,
Langts a no, lafft nix davo.

Oans deafst mia glaam, amoi iss so weit.
I kenn di, I woäß scho, daass di des ned gfreit.
Dann kriegst an Fuaßtritt und no vui schlimma,
Freind und Familie brauchen di nimma.

Oans deafst mia glaam, des daat mia stinga.
Sitz de zu mia hea, deamma woos dringa.
Des geht scho, des basst scho.
Bist hint dro, du arma Mo,
Langts a no, lafft nix davo.

Datenklau

Wea hod von meina Cloud de Daten klaut?
Mei Lebn versaut ?
Wea hod von meina Cloud de Daten klaut?
I hob vertraut!

Des war bestimmt de NSA, mitnand mim BND.
De warn bei mia auf meina Cloud.
Das war da Choasclub dabei, Piraten ollerwei.
De warn bei mia auf meina Cloud.

Wea hod von meina Cloud de Daten klaut?
Mei Lebn versaut?
Wea hod von meina Cloud de Daten klaut?
I hob vertraut!

Do war Privates im Detail, de Fotos von da Sauferei.
Des warn bei mia auf meina Cloud.
Do warn de Pornos aa dabei, de sejba drahtn glei.
Des warn bei mia auf meina Cloud.

Wea hod von meina Cloud de Daten klaut?
Mei Lebn versaut?
Wea hod von meina Cloud de Daten klaut?
I hob vertraut!

Wea hods klaut? Wea hods klaut?
Und mei Lebn so versaut?
Wea hod von meina Cloud de Daten klaut?

Universum

Jeda Mensch hod sei eigens Universum.
Des hod er sejba baut und es is guad warn.

Jeda Mensch hod wos, ganz diaf in eahm drin,
des wo koa andara hod.
Jeda Mensch hod wos, do is er saugwad,
do kannt er Wejtmoasta sei.

Und wenn da Mensch stirbt.
Und wenn da Mensch stirbt.
Stirbt aa sei Universum.

Jeda Mensch hod sei eigens Universum.
Des hod er sejba baut und es is guad warn.

Schod is um jedn, a um an Blädn.
Schod is des scho, Frau oder Mo.
Des is a Mist, Moslöem oder Christ.
Weil du vergisst.

Und wenn da Mensch stirbt.
Und wenn da Mensch stirbt.
Stirbt aa sei Universum.

Mia verbrennan

Auf d'Nocht is des Unglück kemma,
d'Häusa brennan.
Renga fangts ned o,
bloß des kann hejfa.

D'Natur hod lang scho gnuua,
d'Natur hod lang scho gnuua, wui sei Ruah.

Mia verbrannan, mia verbrannan ...

Auf d'Nocht is des Unglück kemma,
d'Leit ham Angst griagt.
D'Hoffnung stirbt am End,
wo bleibt de Rettung?

D'Natur hod lang scho gnuua,
d'Natur hod lang scho gnuua, wui sei Ruah.

Mia verbrannan, mia verbrannan ...

Mia verbrannan, mia verbrannan.
Na na na, des deaf ned sei!
Mia verbrannan, mia verbrannan.
Warum mia und ned de andan?

Auf d'Nocht is des Unglück kemma,
d'Leit ham nochdenkt.
Jetzt moaß wos bassiern,
kapierts hams olle!

D'Natur hod lang scho gnuua,
d'Natur hod lang scho gnuua, wui sei Ruah.

Mia verbrannan, mia verbrannan ...

Mia verbrannan, mia verbrannan.
Na na na, des deaf ned sei!
Mia verbrannan, mia verbrannan.
Warum mia und ned de andan?

Raucher

Raucher zoin de Tabaksteier,
sorgn beim Staat für volle Kassn.
Raucher san vui friedlicher,
weil ses gmiatlich ogeh lassn.
Raucher redn mitnand vui öfta
wia de Nichtraucher, ganz gwies.
Raucher wissen deswegn mehra,
wos a guad füa d'Arbat is.

Raucher ham, Raucher ham meine Sympathie.
Raucher ham, Raucher ham an eigenen Esprit.
Raucher ham, Raucher ham meine Sympathie.
Raucher san koa Opfer der Raucherindustrie.
Niamois!

Raucher san zwar öfta krank,
sogt d'Statistik, des kunn sei.
Raucher sterbn im Durchschnitt frihra,
und wos is do scho dabei?
Raucher dean de Rentenkassen
stark entlasten, grad desweng.
Raucher san de bessern Menschen,
kimmts ma, wenn i so nohdeng.

Raucher ham, Raucher ham meine Sympathie.
Raucher ham, Raucher ham an eigenen Esprit.
Raucher ham, Raucher ham meine Sympathie.
Raucher san koa Opfer der Raucherindustrie.
Niamois!

S-Bahn-Fahrn

Beim S-Bahn fahrn sehg i vui Leit,
wia's dangan: Bloß ned oredn heit,
wia's schaug mit einem laaren Gschau,
wia's dositzn ganz furchtbar grau.

Soi i's oredn einfach so?
Oder laffans dann davo?
Deaf ma se denn sowos traun?
Erst moi wartn, erst moi schau.

I gib's ja zua, aa mia gehts so,
dass i mia deng: Red mi ned o,
dass i schaug mit laarem Gschau,
dass i dositz furchtbar grau.

Und letzt moi, i woäß nimma wo,
redt mi glatt a Madl o.
Deaf ma se denn sowos traun?
Erst moi wartn, erst moi schau.

Sie froggt erst um den Blotz danebn.
Und dann verzajt sie mia ihr Lebn.
Na guad verzaj i hoid aa von mia,
Und Zeit vergäht ruckzuck dafüa.

Warum is des ned jedsmoi so?
Ab sofort red i d'Leit o.
Deaf ma se denn sowos traun?
Deaf ma se denn sowos traun?
Deaf ma se denn sowos traun?
Is mia egal, ich machs einfach!

Vampire in Grea

I sitz beim Wirt, es is scho drei,
und draußen lauert Polizei.
Da Wirt schaut ernst und deit zu mia.
Jawoi sog i, bring no a Bier.

Beim Zeun do zwinkan mia uns zua,
und i woäß, wos i zerscht no dua.
Bevor i do auf d'Straß nausgäh,
kau i schnej a Knoblauchzäh.

Auf d'Nocht sans unterwegs, d'Vampire ganz in Grea,
do is des mei guads Recht, dass i mi dageng wea.

Grod wui i mi ins Auto sitzn,
siehg i scho a Kelle blitzn.
"Hams wos drunga, bloßns moi",
song de Grean, i hob koa Woi.

Und wia de zwoa de Werte seng,
iss um eahna Tarnung gescheng:
"A Bluadprob kunst do glatt vergessn,
dea hod ja grod an Knoblauch gfressn."

Auf d'Nocht sans unterwegs, d'Vampire ganz in Grea,
do is des mei guads Recht, dass i mi dageng wea.

De zappfan dia as Bluad, egal ob mit Promillen,
de Kerle sauffan olles, a gega deinen Willen.

Da Knupf

Wo is des Lem heit no lebenswert?
Des kunn mia koana song.
Wo is dea Typ, dea mia nia zuahead?
Mit dem daat i mi gern schlong.

Wo is da Sinn, den da Fortschritt macht?
Wenn'a mehra nimmt ois ea bringt.
Wo is dea Typ, der mi grad auslacht
Dea wo mi zum Handeln zwingt.

Zoag mia den Knupf, dea eahm wegga beamt,
wo i einfach drucka muaß.
Zoag mia den Knupf, dea eahm fremd bestimmt,
zoag ma'n einfach und i dua's.

Wo is des Lem heit no lebenswert?
i wissats scho, wennis'd mi frogst.
Hoid di an mi, des is nia verkehrt.
Hoid di an mi, wennis'd as vertrogst.

i kenn den Knupf, dea uns wegga beamt,
wo i einfach drucka muaß.
i kenn den Knupf, dea unsan Weg bestimmt,
foig ma noch und i dua's.

Zu zwoat muaßt sei

Wenn a Reh vor dir auf d'Strass naus laaft,
wuid aussagsprunga ausm Woaz,
dann kimmt hintnoch bestimmt a zwoats.

Langst du am Losstand in de Tromme,
und host pfeigrod an Hauptgewinn,
dann is bestimmt no oana drin.

So is des mit ganz vui Sachan,
s'Unglück kimmt aa nia alloa,
und dageng kunnst gar nix dua.

Fast kannt ma scho moana,
des waar a Naturprinzip,
wia da Selbsterhaltungstrieb.

Alloa is schlecht, zu zwoat muaßt sei.

Alloa wennsd bist, bist isoliert.
Alloa wennsd bist, weasd gern ausgeschmiert.
Alloa wennsd bist, bist du da D e p p.

Alloa is schlecht, zu zwoat muaßt sei.

Zu zwoat wennsd bist, bist besser dro.
Zu zwoat wennsd bist, dann schauns di o.
Zu zwoat wennsd bist, bist du a M a c h t.

Da Wiesn-King

Ganz im Vertraun,
i führ a Doppellebn.
Dua ned so schau,
es hod se ergebn.

Dogsüber sitz i
beim Chef im Büro.
Hi und do schwitz i,
kimmt ned oft vor.

I zähj de Stunden
bis zum Feieram.
San de überwunden,
gibt's Freizeitalarm.

Dann hoaßts geniesn,
und des jedn Dog.
Ausse auf d'Wiesn,
wo mi jeda mog.

Mit da Bierschaumkrone
in da Raucherzone
bin i Wiesn-King,
i spendier und dring.

Auf da Bierzelt-Wiesn
gibt's koa Wirtschaftskrisn,
i ois Wiesn-King
woaß von wos i sing.

Spar des ganze Jahr
in meinen Wiesn-Fond,
i spekulier sogar,
gäh volles Risiko.

Weil i brauch vui Gejd,
ohne brauchst ned geh.
Des is oiss, wos zähjt,
und es macht mi schee.